

Euskal presoak Manifestazio nazionala

PRESOEN ESKUBIDEEN ALDEKO ASTEAK IZANDAKO PARTE-HARTZEAREN ISLA IZAN ZEN ATZOKO MANIFESTAZIOA

Presoen eskubideak errespetatzeko eskatu dute berriz ere milaka lagunek Donostian

■ Manifestazio nazionala egin zuten atzo Donostian, presoek aldeko greba eta mobilizazio asteari amaiera jendetsua emanaz

■ Antolatzaileen arabera, 35.000-40.000 lagun inguru manifestatu ziren 'Euskal presoek eskubideen defentsan' lelopean

■ Preso Politikoen Kolektiboak gose greba utzi duela jakinarazi zuen, manifestazioaren amaieran irakurri agiri baten bidez

Eider Goenaga / Donostia

DONOSTIAKO kaleetan gutxitan ikusi den bezalako manifestazioa izan zen atzokoa. Antiguako tunelaren inguruan milaka pertsona zeuden bilduta, aste osoan zehar egin diren ekimenetan izandako parte-hartzearen isla, baina ibilbideak aurrera egin ahala gero eta jende gehiago elkartu zitzairen. Buruaren eta amaieraren artean 40 minutuko aldea zegoen, eta hasierako pankarta Bulebarrera iritsi zenean amaiera oraindik La Perlan zegoen. Antolatzaileen arabera, 35.000-40.000 pertsona inguru manifestatu ziren atzokoan.

Manifestazio buruan presoek argazkiak zeramatzaten senideek; eta atzean, deialdia egin zuten alderdi, sindikatu eta bestelako erakundeetako kideek *Euskal presoek eskubideen defentsan* zioen pankarta zeramaten. Deia zabala zen, eta zabala ere antolatzaileen ordezkariak; han zeuden Zutik, AB, HB-EH, Batzarre, EHNE, ELB, Hiru, Abokatu Euskaldunen Sindikatua, STEE-EILAS, ESK, Hautsi, IA, Haika, ABK, EHE, Esait, EHGAM, Elkarri, Egizan, Eguzki, Gernika Batzordea, Bertsozaleen Elkartea, Herria 2000 Eliza, Gogoan, Kakitzat, Gureak, Senideak, Koordinaketa, AAB eta Presoen Aldeko Plataformak.

Presoen aldeko oihuek hautsi zuten isiltasuna

Manifestazioa bide ertzean zegoen jendetzaren txalo artean hasi zen; eta, berez isila bazen ere, presoek aldeko oihuek ibilbide osoan nagusi izan ziren. Presoen etxeratzea eta amnistia osoa aldarrikapen nagusiak baziren ere, manifestazio amaieran PPren sakabanaketa politikaren kontrako oihuek eta ETA erakunde armatuaren aldekoak



AMAIA ZABALO

Goian, manifestazio amaierako ekitaldia; behean, deialdia egin zuten alderdi, sindikatu eta erakundeetako ordezkariak.



entzun ahal izan ziren. Normaltasun osoz burutu zen manifestazioa, eta hasierako pankarta 18:45ean iritsi zen Bulebarrean prestatua zuten

oholtzara. Han, azken manifestariak oraindik San Martin kalea zeharkatzen ari zirela jakinik, trikitilariak ekin zioten lanari, Bulebarra apurka

apurka erabat betetzen zen bitartean. Oraindik azkeneak iritsi gabe zeudela hasi zen ekitaldi politikoa, eta AABetako Juan Mari Olanok

21 urte preso egon den Kiko Martinezek eman zion hitza, hark Preso Politikoen Kolektiboaren erabakia ezagutaraz zezan. Presoek gauerdiko 12:00etan azaroaren 1ean hasitako gose greba mugagabeari amaiera ematea erabaki zutela jakinarazi zuen, eta txalo andana entzun zen, hainbat senideren begietan malkoak ere ikus zitezkeelarik.

Senideetako Tomas Karre-raren adierazpenekin eta Juan Mari Olanoren konpromisorako eta elkarlanerako deialdiarekin eman zitzaion amaiera manifestazioari eta presoek eskubideen aldeko greba eta mobilizazioari. Artean, oraindik hainbat eta hainbat lagun Bulebarrera iristeko zeuden.